

MASJID WADAH KEPIMPINAN RAJA : PENGALAMAN NEGARA BRUNEI DARUSSALAM

HAJI ISMAIL BIN HAJI ABD MANAP
Pengarah Hal Ehwal Masjid
Jabatan Hal Ehwal Masjid
Kementerian Hal Ehwal Ugama
Negara Brunei Darussalam

Pendahuluan

Institusi masjid adalah merupakan institusi yang terpenting dalam pengukuhan penyebaran ajaran agama Islam dan pemerintahan negara yang berkesan sejak zaman Rasulullah *s.a.w* lagi hingga masa sekarang. Bagi melihat kekuuhan institusi masjid di Brunei Darussalam, saya akan mengimbas beberapa sejarah silam dari abad ke 15 M hingga masa kini yang membuktikan betapa institusi ini memainkan peranan dalam pembangunan agama, umat dan juga kepimpinan negara.

Pembangunan institusi masjid di Brunei pada permulaannya telah menghadapi liku-liku yang kontroversi khususnya dari pihak penjajah-penjajah barat yang tidak jemu-jemu untuk menyekat perkembangan ajaran agama Islam yang suci itu mempengaruhi masyarakat majmuk di kawasan-kawasan kepulauan melayu. Sifat-sifat keangkuhan penjajah-penjajah ini akan dapat di lihat dalam perbincangan ini dan juga kesan pengaruhnya kepada kepimpinan raja dan masyarakat Brunei hingga masa kini. Di samping itu, akan dijelaskan juga berhubung dengan kebangkitan Islam melalui pembangunan institusi-institusi masjid yang akhirnya menjadi kenyataan sebagai lambang keteguhan kepimpinan raja dan keagungan syiar Islam di Brunei Darussalam.

Sebagaimana telah tercatat dalam sejarah, Brunei adalah salah sebuah negara yang wujud bersaing dengan negara-negara tua di rantau ini.¹ Brunei pada suatu ketika dahulu juga merupakan sebuah negara yang berpengaruh serta mempunyai jajahan takluk yang luas di sebelah rantau sini khususnya selepas kejatuhan Melaka ke tangan Portugis pada tahun 1511M. Kini Brunei pada masa sekarang adalah merupakan sebuah negara yang kecil yang mempunyai keluasan hanya 5,765 kilometer persegi, serta mempunyai keramaian penduduk kira-kira 344,500 orang sahaja.² Sungguhpun saiz negaranya yang kecil serta mempunyai bilangan penduduk yang kecil ini, penduduk Brunei telah mengalami kehidupan yang aman dan damai serta dapat menikmati kebahagiaan hidup dari hasil buminya yang dilimpahkan Allah keatasnya.

Dalam keadaan negara dan penduduk yang begini, Brunei telah menjadikan negaranya sebagai sebuah negara Islam yang berkonsepkan Malayu Islam Beraja. Berdasarkan kepada konsep ini, masayakat Brunei telah mengamalkan Islam itu sebagai cara hidup mereka yang diwarisi sejak zaman berzaman. Maka tidak hairanlah dalam konsep pemerintahan di Brunei lebih mengutamakan Islam itu sebagai dasar pentadbirannya.

Peranan Raja Terhadap Pembinaan Masjid

Sebagai sebuah institusi yang ulung dan agong dalam Islam, masjid adalah merupakan sebuah pusat ibadat dan *mu'amalat*, pusat penyebaran agama Islam, pusat pemerintahan dan pentadbiran, gedung ilmu pengetahuan, khazanah hikmat, pusat pembentukan akhlak dan juga merupakan pusat kegiatan yang mendatangkan manfaat

¹ Haji Awang Muhammad Jamil Al-Sufri, POKADRDSU(DR.), *Tarsilah Brunei*, Brunei Darussalam, 1990., cet. i., hal. 1.

² *Brunei Darussalam Statistical Yearbook 200/2001*, Brunei : Department of Statistics, Department of Economic Planning and Development, Prime Minister's, hal. Xix..

kepada Islam dan umatnya.³ Kejayaan Islam melalui masjid ini dapat dilihat dan dibuktikan sejak zaman Rasulullah s.a.w lagi dan para sahabat hingga sekarang ini, di mana masjid merupakan lambang dan identiti kedaulatan Islam di muka bumi ini.

Berdirinya masjid di sesuatu tempat itu, menunjukkan tegaknya juga syiar agama Islam di tempat itu. Islam telah berkembang dari satu tempat kesatu tempat yang lain telah menunjukkan hasil dan pengaruh yang baik serta dapat diterima oleh akal fikiran manusia seluruhnya. Ini disebabkan metode atau cara penyebaran agama Islam itu sendiri tidak dilakukan secara paksaan, bahkan ianya dilakukan mengikut landasan-landasan yang diajarkan oleh Islam. Firman Allah s.w.t:

ادع إلى سبيل ربك بالحكمة والموعظة الحسنة وجدلهم
بالتى هي أحسن إن ربك هو أعلم بمن ضل عن سبيله
وهو أعلم بالمهتدین.⁴

Terj: *Serulah ke jalan Tuhanmu (wahai Muhammad) dengan hikmat kebijaksanaan dan nasihat pengajaran yang baik, dan berbahaslah dengan mereka (yang engkau serukan itu) dengan cara yang lebih baik; sesungguhnya Tuhanmu Dialah jua yang lebih mengetahui akan orang yang sesat dari jalanNya, dan Dialah jua yang lebih mengetahui akan orang-orang yang mendapat hidayah pertunjuk.*

Firmannya lagi:

لا إكراه في الدين قد تبين الرشد من الغي فمن يكفر
بالطغوت ويوعن بالله فقد استمسك بالعروة الوثقى لا
انفصال لها والله سميع عليم.⁵

³ Dr.Awang Haji Mahmud Saedon Bin Awang Othman, Prof. Dato', *Masjid Fungsi dan Peranannya*, Brunei Darussalam., Jabatan Hal Ehwal Masjid, KHEU, 1996., cet. i., hal. 18.

⁴ S. Al-Nahl : A. 125.

⁵ S. Al-Baqarah : A. 256.

Terj: *Tidak ada paksaan dalam ugama (Islam), kerana sesungguhnya telah nyata kebenaran (Islam) dari kesesatan (kufur). Oleh itu, sesiapa yang tidak percayakan Taghut, dan ia pula beriman kepada Allah, maka sesungguhnya ia telah berpegang kepada simpulan (tali ugama) yang teguh, yang tidak akan putus. Dan (ingatlah), Allah Maha Mendengar, lagi Maha Mengetahui.*

Konsep dakwah Islamiah yang diajarkan oleh Allah s.w.t itu, ternyata telah membawa kejayaan kepada perkembangan agama Islam di seluruh pelusuk dunia. Peranan Islam dalam menyebarluaskan ajarannya tidak cukup dengan memberikan pengajaran dan kefahaman sesempurnanya sahaja, akan tetapi bertanggungjawab dalam menyediakan tempat yang sesuai untuk tujuan tersebut dengan mendirikan masjid-masjid, balai-balai ibadat, surau-surau, madrasah dan sebagainya, bagi kemudahan penganutnya beribadat kepada Allah s.w.t. Kesemua institusi ini telah terbukti dalam sejarah tentang kejayaannya dalam mempertahankan dan menangani permasalahan umat Islam seluruhnya sebagaimana yang kita lihat dari sejak zaman Rasulullah s.a.w hingga dewasa ini.

Jika kita imbas kembali perkembangan Islam di rantau ini khususnya di Brunei Darussalam, pada abad ke 14 M, Islam telah diterima dengan rasminya setelah mana pemerintahnya atau rajanya iaitu Awang Alak Betatar memeluk agama Islam pada tahun 1368 M dengan dikenali sebagai Sultan Muhammad Shah. Baginda telah membawa Brunei pada ketika itu sebagai sebuah negara Islam yang berpegang teguh dengan syari'at Nabi Muhammad s.a.w⁶ serta menjadi ikutan kepada rakyat jelata dalam mengagungkan Islam sebagai agama rasmi negara.

⁶ P.L.Amin Sweeney, *op cit*, hal. 11.

Seperti mana juga pada zaman Rasulullah *s.a.w.*, pembentukan kerajaan Islam di Madinah bermula dengan berdirinya Masjid *al-Nabawi* yang dianggap sebagai nadi kepada keutuhan masyarakat dan negara Islam pertama, pusat perpaduan dan lambang kekuatan Islam,⁷ maka tradisi ini telah diaplikasikan oleh para pengikut Baginda termasuk para mubaligh yang bertanggungjawab dalam menyebarkan agama Islam di merata tempat di dunia ini termasuklah Brunei, juga telah mendirikan sebuah masjid pertamanya sebagaimana yang tercatat dalam sejarah bahawa pembinaan masjid tersebut telah berlaku pada zaman pemerintahan Sultan Brunei ketiga iaitu Sultan Sharif Ali dalam tahun 1426-1432 M di Kota Batu.⁸ Dalam ‘Silsilah Raja-Raja Berunai’ menyebutkan:

Maka Sharif Ali inilah mendirikan agama Islam dan mengeraskan shari'at nabi kita Muhammad s.a.w di dalam Berunai, dan membuat masjid.⁹

Sungguhpun telah tercatat dalam sejarah tentang pembinaan masjid ini, namun begitu adalah dipercayai bahawa telah wujud sebelum itu konsep dan peranan masjid seperti surau-surau, balai-balai ibadat dan rumah-rumah persendirian yang dijadikan sebagai tempat perkumpulan bagi orang-orang Islam pada ketika itu, di samping sebagai tempat untuk mempelajari ajaran-ajaran Islam yang diterima daripada para mubaligh Islam yang datang dan singgah di Brunei dan juga sebagai tempat mereka mengerjakan amal ibadat kepada Allah *s.w.t.* Keadaan ini boleh berlaku kerana Islam telah lama bertapak dan diterima secara rasminya di Brunei sebelum itu. Selain itu berkemungkinan juga Sharif Ali adalah salah seorang daripada pengembang agama Islam yang berpengaruh di Brunei

⁷ Prof.Dato Dr.Awang Haji Mahmud Saedon Bin Awang Othman., *op cit.*, hal. 11.

⁸ Kota Batu terletak kira-kira 2 kilometer dari pusat bandar ibu kota Bandar Seri Bagawan. Lihat P.L. Amin Sweeney, *op cit*, hal. 11.

⁹ *Ibid.*, hal. 54.

kerana dia datang ke Brunei dijangkakan sekitar tahun 1375 M.¹⁰ Sebelum Sharif Ali berkahwin dengan Puteri Brunei, beliau juga dijangkakan telah lama berada di Brunei dan sudah tentu mempunyai banyak jasa yang dibuatnya sehingga beliau menjadikan dirinya terkenal dan dapat menjadi menantu sultan sebelum diangkat menjadi Sultan Brunei menggantikan bapa mertuanya Sultan Ahmad.

Sejak bertapaknya Islam di Brunei, pembangunan institusi masjid semakin berkembang luas selepas tercatatnya pembinaan masjid pertama di Brunei, khususnya pada setiap zaman pemerintahan sultan-sultan yang memerintah seperti pada zaman pemerintahan Sultan Abdul Hakkul Mubin (1661-1673 M) sultan Brunei ke 13, baginda telah membina sebuah masjid di atas sebuah pulau iaitu Pulau Chermin. Pembinaan ini serentak dengan pembinaan Istana Baginda dan Lapau, iaitu tempat mengadakan permesyuaratan samada peringkat negeri atau pembesar-pembesar negeri. Peristiwa ini berlaku apabila Brunei dilanda perang saudara di antara Sultan Abdul Hakkul Mubin dengan Pengiran Bungsu.¹¹

Menurut laporan *Spencer St. John*, mengatakan bahawa pada tahun 1836 M telah wujud beberapa buah masjid. Masjid-masjid itu ada yang mengamalkan fahaman agama dan ada yang tidak mengamalkannya.¹² Jika dilihat tahun yang dinyatakan itu adalah berlaku pada zaman pemerintahan Sultan Omar Ali Saifuddin II, Sultan Brunei Ke-23, yang memerintah antara tahun 1828-1852 M. Laporan tersebut telah membuktikan bahawa kehebatan masjid-masjid pada ketika itu sangat ketara sekali di mana masjid mendapat perhatian penuh di kalangan masyarakat Brunei untuk mereka melakukan

¹⁰ Awang Muhammad bin Abdul Latif, ‘Kemasukan Agama Islam di Brunei’, *Pusaka*, Jabatan Pusat Sejarah, Brunei Darussalam, Bil. 2, 1988., hal. 13.

¹¹ P.L Amin Sweeney, *op cit*, hal. 61.

¹² Spencer St.John, *Life in the Forest of the Far East, Travels in Sabah and Sarawak in the 1860.*, Oxford University Press, Singapore, New York, 1986., hal. 275.

aktiviti-aktiviti keagamaan seperti mengadakan '*Tariqat Samaniyah*' dan sebagainya yang sangat berpengaruh pada ketika itu¹³. Bertolak dari peranan masjid inilah, usaha-usaha untuk memajukan pembangunan masjid dimerata tempat di Brunei telah diambil perhatian oleh pihak kerajaan, di mana pada zaman pemerintahan Sultan Haji Omar Ali Saifuddin III, sultan Brunei ke-28 yang memerintah pada tahun 1950-1967 M telah memulakan satu era baru dalam pembangunan Brunei dengan memasukkan perbelanjaan pembinaan masjid-masjid di seluruh negara ke dalam Rancangan Kemajuan Negara (RKN)¹⁴.

Pada zaman pemerintahan Sultan Haji Omar 'Ali Saifuddien III¹⁵ ini, pembangunan negeri¹⁶ dan perkembangan agama Islam, menjadi matlamat utama dalam manifesto pemerintahan baginda. Pembangunan Masjid adalah menjadi asas dalam segala pembangunan yang ada di negeri ini. Sebagai bukti yang nyata ialah terbinanya sebuah masjid yang dianggap tercantik di Asia Tenggara hasil dari usaha dan inisiatif baginda sendiri dalam merekabentuk bangunan masjid tersebut sehingga terkenal keseluruh dunia. Masjid ini dibina pada 4hb Februari, 1954M, dan siap serta dirasmikan pada 26hb September, 1958M dengan perbelanjaannya sebanyak \$ 7.7 juta.¹⁷ Masjid ini dinamakan sempena dengan nama baginda iaitu Masjid Omar Ali Saifuddien, terletak di pusat Bandar Seri Begawan.

¹³ P.L Amin Sweeney, *op cit*, hal 50.

¹⁴ Awang Haji Metussin bin Haji Baki, *Catatan Sejarah Masjid-Masjid Negara Brunei Darussalam*, Jabatan Hal Ehwal Syariah, KHEU, Bandar Seri Bagawan, 1993, hal. 11.

¹⁵ Baginda adalah Sultan Brunei yang ke-28, ayahnya kepada Sultan Haji Hassanal Bolkiah, Sultan Brunei ke-29 yang memerintah dari tahun 1967M hingga sekarang.

¹⁶ Brunei maseh di bawah naungan pemerintahan kerajaan British dan mencapai kemerdekaan pada tahun 1984M.

¹⁷ Haji Metussin Haji Baki, *op cit*, hal. 11.

Jika dilihat pada zaman itu, tidak terdapat bangunan yang mengalahi kecantikan masjid tersebut, bahkan tidak ada satu bangunan pun disekelilingnya yang melimpasi ketinggian menara Masjid Omar Ali Saifuddin ini. Masjid Omar Ali Saifuddin juga adalah lambang kedaulatan agama Islam di Brunei dan ianya lebih terkenal di kalangan masyarakat antarabangsa apabila masjid ini menjadi gambar hiasan kepada mata wang bagi Negara Brunei Darussalam. Ini menunjukkan betapa pekanya baginda dalam meninggikan imej kesucian agama Islam melebihi dari segala-galanya dan sekaligus meletakkan masjid sebagai wadah kepimpinan raja di Brunei Darussalam.

Langkah yang dibuat oleh Sultan Haji Omar ‘Ali Saifuddien III ini, telah dikembangkan lagi oleh anakanda baginda iaitu Kebawah Duli Yang Maha Mulia Paduka Seri Baginda Sultan Haji Hassanal Bolkiah, Sultan Brunei ke-29 (1967M hingga sekarang). Sebagai penyambung kepada dasar pemerintahan ayahnda baginda, Kebawah Duli Yang Maha Mulia Paduka Seri Baginda Sultan Haji Hassanal Bolkiah selaku Ketua Ugama, sesungguhnya sekali-kali tidak mengabaikan keperluan-keperluan yang membawa kepada kemajuan perkembangan agama Islam dalam pemerintahannya. Ini dapat dilihat pada awal tahun 1960M hingga ketahun 1980-an, atas kebijaksanaan pimpinan ayahnda baginda dan baginda sendiri telah dapat menyusun rancangan pembinaan masjid-masjid diseluruh negari¹⁸ dengan memasukkan perbelanjaan pembinaannya ke dalam Rancangan Kemajuan Negara,¹⁹ di samping tidak juga menyekat amal ibadat atau kebajikan rakyat pada menyumbangkan derma atau wakaf-wakaf persendirian dalam sama-sama menuntut kebajikan akhirat dan keredaan Allah s.w.t. Dalam hal ini baginda sendiri telah menjadikan diri baginda sebagai contoh dengan mewakafkan sebuah masjid yang terbesar dan

¹⁸ Perancangan yang disusun itu ialah Pembinaan Masjid-Masjid Utama atau Mukim dan Kampong-Kampong.

¹⁹ Haji Metussin Bin Haji Baki., *op cit.*, hal. 12.

termoden di negara ini yang dilengkapi dengan kemudahan-kemudahan tertentu²⁰ bagi keselesaan para jemaah dan pentadbiran masjid itu sendiri. Masjid ini telah dibina pada tahun 1989M dan digunakan sepenuhnya pada 14hb Julai 1994M. Masjid ini dinamakan sebagai Jame' ‘Asr Hassanil Bolkiah.

Sambutan Masyarakat Kepada Masjid.

Berdasarkan fakta sejarah yang telah dikemukakan itu, menunjukkan bahawa masjid itu merupakan sebuah institusi yang sangat besar pengaruhnya dalam kehidupan umat Islam. Masjid yang pada asalnya merupakan tempat perkumpulan atau tempat orang-orang Islam berjemaah di dalamnya, adalah juga menjadi lambang keutuhan kepimpinan raja dan perpaduan umat Islam sejagat.

Seperti juga di negeri-negeri kepulauan melayu yang lain, pembinaan masjid adalah merupakan suatu syiar yang membanggakan, dan boleh menimbulkan semangat kerohanian yang tinggi kepada masyarakat Islam. Ini kerana Islam telah menjanjikan kepada sesiapa sahaja daripada umatnya yang mendirikan masjid akan mendapat ganjaran yang besar di akhirat kelak. Seperti mana sabda Rasulullah s.a.w:

من بنى مسجداً يذكر فيه اسم الله، بنى الله له بيته في
الجنة.²¹

²⁰ Masjid ini mempunyai kakitangan-kakitangan dan pentadbirannya tersendiri, perpustakaan yang mengumpulkan berbagai-bagai jenis kitab dan buku-buku agama dalam tiga bahasa iaitu Arab, Inggeris dan Melayu bagi tujuan sebagai tempat rujukan-rujukan dan bahan bacaan kepada sesiapa sahaja yang ingin mengkaji dan sebagainya. Masjid ini juga mempunyai bilik-bilik belajar, dewan serba guna, bilik masyuarat dan bilik bacaan.

²¹ Ibn Majah., *op cit.*, *Kitab al-Masajid wa al-Jama'at, Bab Man Bana Lilah Masjidan.*, Kaherah., t.t., bil. 735., 1: 243. Menurut kitab *al-Zawaid* : Hadis Umar ini adalah *Mursal*, kerana Uthman Abd Allah Ibn Suraqah meriwayatkan daripada Umar Ibn al-Khattab nenek bagi ibunya, dan dia tidak mendengar daripadanya, sebagaimana juga kata al-Mazzi dalam *al-Tahdhib*.

Tetapi Barangsiapa yang membina masjid kerana Allah, di dalamnya di sebutkan namanya, nescaya Allah akan membina baginya sebuah rumah di dalam syurga.

Doa yang dijanjikan itu adalah merupakan satu galakkan atau semangat Islam betapa pentingnya mendirikan atau membina sesbuah masjid itu yang dianggap sebagai rumah Allah tempat orang-orang Islam berkumpul dan beribadat kepada Allah s.w.t lebih-lebih lagi ianya juga di anggap sebagai ganti kepada *Ka'batullah*²² al-Haram di Mekkah. Berdasarkan kepada kenyataan inilah, menimbulkan rasa hormat dan mengagongkan identiti masjid itu sebagai syiar Islam, merasuk ke dalam jiwa masyarakat Islam Brunei pada ketika itu. Ini terbukti pada zaman pemerintahan Sultan Sharif Ali seluruh masyarakat Islam Brunei telah sama-sama berganding bahu serta bergotong-royong dalam melibatkan diri pada kerja-kerja amal kebajikan untuk mendirikan dan membina sebuah masjid yang pertama di Brunei. Dalam hal ini ‘Silsilah Raja-Raja Berunai’ telah membayangkan betapa padunya sambutan dan semangat masyarakat Islam Brunei dalam sama-sama mempertahankan kesucian dan keagongan agama Islam pada ketika itu. ‘Silsilah Raja-Raja Berunai’ menyebutkan :

Shahadan sebermula adapun apabila berbuat masjid, maka pengeraan Temenggong mengepalakan dengan segala raja-raja dan isi negeri. Ada pun masjid itu, ada kalanya dua pangkat atau tiga pangkat. Maka yang pada pehak kanan, Pengeraan Bendahara dengan segala cheteria menterinya empunya suku, dan yang pada pehak kiri, Pengeraan Temenggong mengepalakan dengan segala cheteria menterinya. Dan yang suku dari belakang, Pengeraan Di Gadong dengan segala anak raja-raja dan pekayoh istana dan menteri. Adap kepada penjuru kiblat, segala Datu' Imam Khatib mengepalakan serta mudim dan segala anak raja-raja muda-muda mana yang anak

²² P.L Amin Sweeney, *op cit*, hal. 29.

murid-muridnya, kerana masjid itu ganti Ka'batu 'llah yang di Mekka, sebab itulah maka di besarkan mengerjakan dia, ra'yat menteri sekelian raja-raja; fardhu segala raja yang Islam mendirikan masjid seperti sabda Nabi s.a.w.: Tempat menyembah Allah Ta'ala, maka barangsiapa berbuat dia, kelak-kelak di perbuat akan mahligai di dalam syurga, dan barangsiapa menerangkan atau memasang pelita di dalamnya, maka di terangkan Allah Ta'ala di dalam kuburnya. Maka tiada fakir berlanjutkan kalam-kalam perkataan pahalanya.

Maka berbuat mihrab ya'ni tempat perimaman, datu seorangnya, dan Pengeran Bandahara memberi bertikar yang kanan dan Pengeran Temenggong memberi bertikar sebelah kiri, dan Pengeran Di Gadong memberi pemajang, dan Pengeran Shahbandar memberi tunggul Jumaat. Dan apa bila Duli Yang Di Pertuan sembahyang Juma'at, maka di bubuh chandu dan permaidani akan tempatnya sembahyang daripada pehak kanan mimber; di sisinya Pengeran Bandahara dan Pengeran Di Gadong dan segala raja-raja di dalamnya; dan pada pihak kiri Pengeran Temenggong dan Pengeran Pemancha dan pengeran Shahbandar dengan segala cheteria pengalasan; dan satar yang kedua segala menteri, dan yang berbetulan mimber, segala 'ulama' dan segala hulubalang, dan jika segala orang/baik-baik yang mudamuda pada satar yang ke empat segala fakir dan miskin dan barang sebagainya tiada h-a-l-y banyak satarnya. Sebermula di hadapan pintu masjid itu suatu balai akan tempat duduk selagi belum masuk waktu atau menanti raja-raja datang; dan yang mengerjakan balai itu , imam dengan siraja khatib dan udana khatib dan khatib dan mudim itulah mengerjakan balai dengan segala murid-muridnya.²³

²³ *Ibid*, hal. 28-29.

Penglibatan masyarakat Islam Brunei dalam soal-soal yang berhubung dengan aktiviti-aktiviti keagamaan pada ketika itu amatlah jelas dengan lebih menunjukkan rasa kecintaan yang padu kepada Allah s.w.t, daripada semua golongan lapisan masyarakat sama ada dari peringkat atasan mahu pun bawahan sama-sama mempunyai niat yang sama semata-mata menuntut keredhaan Allah s.w.t.

Kemantapan hidup beragama di kalangan masyarakat Brunei sememangnya wujud sejak zaman berzaman lagi. Ini disebabkan pengaruh yang ditonjolkan sendiri oleh raja dalam kepimpinannya yang taat beragama serta ingin menjadikan Islam itu sebagai pegangan bagi setiap rakyatnya. Sebagai bukti kepada kenyataan ini, sewaktu Brunei menjadi sebuah negara yang berpengaruh serta disegani di rantau ini, iaitu selepas jatuhnya empayar Islam Melaka ke tangan Portugis, telah berlaku satu perperangan antara Brunei dengan Sepanyol pada tahun 1578 M. Perperangan ini berlaku disebabkan kemarahan Sepanyol terhadap para mubaligh Brunei yang giat menyebarkan ajaran agama Islam di kepulauan Filipina, sehingga mereka tidak berpeluang untuk menyebarkan agama Kristian di kepulauan tersebut. Akibat dari tindakan para mubaligh ini, Sepanyol telah menyerang Brunei pada 16hb. April, 1578M, dan berjaya menawan Brunei pada ketika itu. Meskipun mereka berjaya menawan Brunei, mereka tidak dapat bertahan lebih lama di Brunei kerana misi mereka untuk mengkristiankan penduduk Brunei tidak berhasil sama sekali, dan akhirnya mereka dapat dihalau oleh penduduk Brunei setelah menduduki Brunei selama lebih dua bulan. Walau bagaimanapun, sebelum meninggalkan Brunei mereka sempat membakar sebuah masjid, yang mereka anggap sebagai dalang yang melemahkan misi mereka serta pusat kekuatan dakwah Islamiah di rantau ini. Peristiwa ini telah dirakamkan dalam sebuah laporan Sepanyol yang menceritakan bahawa:

Brunei berbangga dengan sebuah masjid yang sungguh indah, tinggi lima tingkat dan di bina daripada kayu hitam

yang orang-orang Sepanyol panggil ‘ebony’. Pada waktu senja hari Isnin 23hb. Jun, 1578, Doktor Sande telah membakar bangunan besar itu. Ianya terbakar sepanjang malam dan pagi esoknya tidak ada apa-apa yang tinggal, tiga hari kemudian dia pun belayar pergi.²⁴

Meskipun masjid itu telah dibakar, namun jiwa masyarakat Islam Brunei tidak mudah untuk dibakar, bahkan semangat juang dalam menyebarluaskan dakwah Islamiah terus dipergiatkan dan diperkuuhkan. Apa yang dilakukan oleh pihak Sepanyol itu hanyalah semata-mata untuk melepaskan geram sahaja tanpa memberi kesan yang positif untuk menekang penyebaran agama Islam di rantau ini. Perbuatan sia-sia Sepanyol itu membuktikan dengan sendirinya bahawa kebenaran fungsi dan peranan masjid dalam Islam itu adalah diakui sebagai berjaya dalam memainkan peranannya di dalam agama Islam itu sendiri.

Peranan Manteri-Manteri Ugama Dalam Kepimpinan Raja

Salah satu tanda mercu terpenting bertapaknya agama Islam itu ialah berdirinya bangunan masjid. Masjid adalah tempat berkumpulnya orang-orang Islam untuk mengerjakan amal ibadat dan menjalankan aktiviti-aktiviti keagamaan dan sebagainya pada setiap masa dan waktu. Di antara perkara yang pasti berlaku di dalamnya ialah sembahyang berjemaah, berkhutbah dan sebagainya. Ini menunjukkan terdapat dua tugas yang berlainan perlu wujud pada masjid itu, iaitu sebagai Imam dan Khatib (pembaca khutbah). Imam itu ertinya seorang ketua atau ikutan orang-orang muslimin yang mengetuai sesuatu kumpulan dalam sembahyang khususnya. Sabda Rasulullah s.a.w:

²⁴ Robert Nicholl, “Myth and Legend in Brunei History” .. BMJ., Vol. VI., No.1., 1985., hal. 40.

إِنَّمَا جَعَلَ الْإِمَامَ لِيُوعِظَ بِهِ، فَإِذَا كَبَرَ فَكَتَرُوا، وَلَا تَكْبُرُوا
حَتَّىٰ يَكُبُرُ، وَإِذَا رَكِعَ فَارْكَعُوا، وَلَا تَرْكَعُوا حَتَّىٰ يَرْكِعَ،
وَإِذَا قَالَ: سَمِعَ اللَّهُ لِمَنْ حَمَدَهُ، فَقُولُوا: اللَّهُمَّ رَبُّنَا لَكَ الْحَمْدُ،
قَالَ مُسْلِمٌ: وَلَكَ الْحَمْدُ، وَإِذَا سَجَدُوا، وَلَا تَسْجُدُوا
حَتَّىٰ يَسْجُدَ، وَإِذَا صَلَّى قَائِمًا فَصَلُوا قِيَامًا، وَإِذَا صَلَّى
قَاعِدًا فَصَلُوا قَعْدًا أَجْمَعُونَ.²⁵

Terj: “Sebenarnya imam itu ditugaskan ialah untuk dijadikan ikutan, oleh itu apabila ia bertakbir hendaklah kamu bertakbir, dan janganlah kamu bertakbir sehingga ia bertakbir (lebih dahulu), demikian juga apabila ia ruku’ hendaklah kamu ruku’, dan janganlah kamu ruku’ sehingga ia ruku’ (lebih dahulu), dan apabila ia mengangkat kepala daripada ruku’ dan membaca: سَمِعَ اللَّهُ لِمَنْ حَمَدَهُ hendaklah kamu membaca: وَلَكَ الْحَمْدُ اللَّهُمَّ رَبُّنَا لَكَ الْحَمْدُ telah berkata Muslim: demikian juga apabila ia sujud hendaklah kamu sujud, dan janganlah kamu sujud sehingga ia sujud (lebih dahulu), dan apabila ia sembahyang dengan berdiri hendaklah kamu sembahyang dengan berdiri, dan apabila ia sembahyang dengan duduk hendaklah kamu semua sembahyang dengan duduk”.

Manakala Khatib pula ialah pembaca khutbah seperti khutbah Jumaat, khutbah dua hari raya, khutbah gerhana matahari dan sebagainya. Pada zaman Rasulullah s.a.w kedua-dua tugas ini dijalankan sekali oleh Baginda sendiri, begitu juga para sahabat Baginda dan Tabi’yn yang ditugaskan untuk menjadi Imam di sesuatu tempat itu mereka juga menjadi khatib. Di sini menunjukkan kedua-dua tugas ini kebiasaan dilakukan oleh seorang Imam atau petugas sahaja.

²⁵ Al-Sijistani., *Sunan...*, *Kitab al-Salat, Bab al-Imam Yusalli min Qu’ud.*, bil. 603., 1: 161.

Di Brunei Darussalam masjid telah ditadbir oleh Imam dan Khatib. Kedua-dua jawatan ini berlainan dari segi makna tetapi sama dari segi perlaksanaan tugas dan perkerjaan di masjid, begitu juga Bilal dan Mudim. Sebenarnya di Brunei terdapat dua kategori masjid yang mempunyai perbezaan antara satu dengan lain, dan ditadbir oleh dua jawatan yang berlainan. Masjid-masjid itu ialah; Masjid Negara iaitu terdiri daripada Masjid Omar Ali Saifuddin dan Jame' 'Asr Hassanal Bolkiah. Kedua masjid ini ditadbir oleh orang-orang yang digelar oleh Raja atau Sultan mengikut adat istiadat Brunei. Imam bagi masjid-masjid ini digelar sebagai salah satu dari 'Manteri Ugama' iaitu Pehin Khatib. Begitu juga bilalnya digelar mengikut adat istiadat Brunei sebagai Mudim.

Manakala masjid-masjid Utama, Mukim dan juga kampong atau qaryah, ditadbir oleh pegawai-pegawai masjid yang ditauliah oleh Raja atau Sultan sebagai Imam dan juga Bilal. Menurut adat istiadat Brunei seseorang Imam atau Bilal tidak boleh menjadi Imam atau bilal di masjid-masjid negara selagi ia tidak di gelar Pehin Khatib atau Mudim mengikut adat istiadat Brunei. Begitu juga Mudim itu sendiri tidak boleh membaca khutbah di masjid-masjid negara dan juga di masjid-masjid pekan maupun kampong.

Mengikut catatan sejarah Brunei, Negara Brunei Darussalam mempunyai Adat Istiadatnya tersendiri. Seperti negara-negara Melayu-Nusantara yang lain Brunei telah mengamalkan adat istiadatnya sendiri sejak dahulu kala lagi, seperti adat temenggung,²⁶ Hukum Kanun, Syariat Islam dan adat resam.²⁷ Kesemua ini mendorong Brunei masih mengamalkan adat istiadatnya hingga sekarang. Di antaranya yang masih wujud ialah istiadat bergelar, istiadat ini bertujuan untuk menggelar orang-orang yang difikirkan layak untuk menjawat gelaran tersebut. Salah satu daripada gelaran-gelaran yang dianggap

²⁶ Siti Zaliha bte Abu Salim. *Op cit.*, hal. 56.

²⁷ Fatimah Mohd. Daud, 'Kerajaan Islam Di Brunei Suatu Tinjauan Sejarah', *Pusaka*, Jabatan Pusat Sejarah, Brunei Darussalam., bil. 3., 1990., hal. 31.

tinggi selepas Cheteria²⁸ ialah Manteri-Manteri Ugama yang terdiri daripada seorang Kepala Manteri iaitu Pehin Datu Seri Maharaja (Mufti), 4 orang Imam iaitu Pehin Datu Imam, Pehin Siraja Khatib, Pehin Tuan Imam dan Pehin Udana Khatib, 4 orang Pehin Khatib dan 4 orang Mudim (bukan Manteri).²⁹

Sistem pentadbiran Islam di Brunei dipercayai sudah wujud seiring dengan perkembangan Islam di Brunei, khususnya pada zaman pemerintahan Sultan Syarif Ali. Pada zaman itu masjid pertama telah didirikan di Brunei, ini menguatkan lagi kewujudan para pentadbir masjid seperti Imam dan Khatib pada ketika itu. Menurut Yang Dimuliakan Pehin Siraja Khatib Dato Paduka Seri Setia Ustaz Haji Awang Yahya, gelaran adat istiadat Manteri-Manteri Ugama telah wujud sekurang-kurangnya pada zaman pemerintahan Sultan Saiful Rijal lagi, Sultan Brunei ke-7 (1575-1600).³⁰ Sumber terawal yang menyentuh perkara ini terdapat dalam laporan Sepanyol pada tahun 1578M, yang mengatakan telah terdapat seorang Khatib di Brunei yang berperanan sebagai pembaca khutbah di masjid.³¹ Dalam laporan Sepanyol pada tahun 1590 M, menjelaskan tentang peranan para khatib di Brunei pada ketika itu, sebagaimana disebutkan:

*Ada tiga jenis (orang) agama.... yang mereka panggil "Catif". Daripada tiga orang "Catif" ini, yang tertinggi ialah seorang sahaja yang mereka panggil "Catif besar"..... yang lain mereka panggil "Catif" adalah tidak lebih daripada mereka yang mempunyai tugas menyediakan masjid dan memberitahu nama hari-hari dan mengkhatain apabila seseorang berkhatahan.*³²

²⁸ Cheteria ialah gelaran khusus bagi Pegiran-Pengiran atau keluarga-keluarga di raja sahaja.

²⁹ Ustaz Haji Awang Yahya bin Haji Ibrahim, Yang Dimuliakan PSKDPSS., 'Pehin-Pehin Manteri Ugama Sebagai "Institusi" Dan Peranan Mereka Dalam Pentadbiran Dan Pemerintahan Negara Brunei Darussalam', Kertas kerja Seminar Antarabangsa Tamadun Islam Di Alam Melayu, Anjuran KHEU, Bandar Seri Begawan, Pada 1hb-Shb Jun, 1989.

³⁰ *Ibid*, hal. 5.

³¹ E.H. Blair and J.A. Robertson, *The Philippine Islands 1493-1803.*, Vol. IV, 1576-1582., hal. 226.

³² John S. Carroll., *Brunei in the Boxer Codex*, JMBRAS., Vol. 55., Pt. 2., 1982., hal. 9.

Dalam laporan tersebut menunjukkan betapa pentingnya pengaruh dan peranan khatib itu dalam pentadbiran agama dan juga kepada hal ehwal kemasyarakatan di Brunei. Berkemungkinan apa yang di maksudkan dengan Khatib Besar itu ialah Siraja Khatib dan dua Khatib Kecil itu pula ialah Udana Khatib dan Khatib. Selain daripada itu tidak kurang pentingnya peranan para Khatib kepada hal ehwal kenegaraan, umpamanya pada abad ke-18M, Raja Bendahara Seri Maharaja Permaisuara pernah mengutuskan satu rombongan keluar negara iaitu ke Jambi yang terdiri daripada Pehin Seri Raja Khatib, Seri Laila Diraja dan Seri Setia Pahlawan untuk merundingkan pembelian ubat bedil dan kain gaberdin.³³ Begitu juga pada tahun 1807M Pehin Khatib Haji Abdul Latif telah dititahkan oleh Sultan Muhammad Tajuddin untuk membeli sebuah rumah wakaf di Mekah bagi tujuan sebagai tempat kediaman jemaah-jemaah haji Brunei yang menunaikan fardu Haji di Mekah.³⁴ Penglibatan Pehin-Pehin Khatib itu mempunyai hubungan dengan ketinggian ilmu pengetahuan yang mereka miliki terutama sekali dalam hukum jual beli dan juga bidang penulisan. Dengan adanya ilmu-ilmu ugama yang tinggi di kalangan Manteri-Manteri Ugama ini telah menjadikan mereka mempunyai kemahiran dalam bidang penulisan. Sebagai contoh, Silsilah Raja-Raja Berunai, telah di tulis oleh Datu Imam Yaakub pada tahun 1735 M atas titah perintah Sultan ‘Alauddin (1730-1745M) iaitu sultan Brunei ke-17, kemudian disambung dan diselesaikan oleh Pehin Khatib Haji Abdul Latif bin Haji Taha pada tahun 1807 M atas titah perintah Sultan Muhammad Tajuddin (1795-1804M) dan (1804-1807M) iaitu sultan Brunei ke-19, kemudian disalin semula

³³ Lihat salinan surat yang tersimpan di British Muzium sejak tahun 1752. Surat ini mungkin ditulis oleh Raja Bendahara Pengiran Muda Bungsu, adinda kepada Sultan Husain Kamaluddin, anak Sultan Haji Mohd. Ali, atau anak Raja Bendahara iaitu Raja Bendahara Sakam.

³⁴ P.L. Amin Sweeney, *op. cit*, hal. 70, dan lihat juga salinan surat perlantikan Nadzir yang menyelenggarakan rumah wakaf al-Marhum Sultan Muhammad Tajuddin di Mekah tahun 1809, simpanan Pusat Sejarah Brunei.

oleh Pehin Datu Imam Aminuddin bin Orang Kaya Digadong Liwaddin pada tahun 1841M.³⁵

Penglibatan para Manteri Ugama khususnya Imam dan Khatib dalam hal ehwal negara dan masyarakat tidak dapat di sangkalkan, kerana mereka ini adalah golongan elit dan alim ulama serta mendapat kepercayaan daripada Istana, kerajaan dan masyarakat. Penglibatan mereka dalam politik negara dapat kita lihat pada tahun 1885M, apabila Pehin Datu Imam Haji Abd.Nakim bin Pehin Orang Kaya Amar Pahlawan Ibrahim, Pehin Siraja Khatib Mohd.Daud bin Radin dan Pehin Khatib Mohd. Abd.Rahman dilantik oleh Sultan Abd. Momin sebagai saksi dalam satu perjanjian dengan pembesar-pembesar Brunei mengenai dengan masalah Limbang pada 20hb. Februari, 1885M.³⁶ Pada tahun 1907M apabila Majlis Mesyuarat Negeri Brunei yang pertama ditubuhkan iaitu setelah Brunei menjadi negara naungan British, seorang daripada Manteri Ugama iaitu “Tuan Imam” telah dilantik menjadi ahli Majlis itu mengikut perlombagaan (*Constitutional Right*).³⁷ Sejak dari tahun 1907M hingga tahun 1959M sebelum tertubuhnya Perlombagaan Brunei 1959, seramai tiga orang Manteri Ugama dan seorang Cheteria iaitu Kadi Besar³⁸ (bukan Manteri) telah dilantik menjadi Ahli Majlis Mesyuarat Negeri.³⁹

Dari segi pendidikan pula para khatib juga bertanggongjawab dalam perkembangan pendidikan ugama Brunei, mereka bukan sahaja bertugas di masjid-masjid dan juga di Istana Sultan malah di antara mereka ada yang mendirikan balai-balai atau

³⁵ P.L.Amin Sweeney, *op cit*, hal. 2 -3.

³⁶ Lihat surat perjanjian mengenai dengan masalah Limbang pada 20hb.Februari,1885, yang tersimpan di Pusat Sejarah Brunei.

³⁷ Hickling, R.H, *Memorandum upon Brunei Constitutional History and Practice*, 1955., hal. 30.

³⁸ Mereka ialah Pehin Datu Imam, Pehin Siraja Khatib, Tuan Imam dan Pengiran Digadong Pengiran Haji Mohammad Salleh. Lihat Ustaz Haji Awang Yahya bin Haji Ibrahim, YDPSKDPSS, *op. cit*, hal. 6,7-8.

surau berdekatan dengan tempat tinggal mereka.⁴⁰ Ini bertujuan supaya penduduk-penduduk kampong tersebut dapat mengikuti pelajaran ugama yang diberikan oleh mereka, di samping sama-sama bersembahyang berjemaah khususnya sembahyang fardu Maghrib dan Isya'. Pada tahun 1936 M pula peranan Imam-Imam dan Khatib-Khatib dalam pendidikan kerajaan pula telah memainkan peranan yang penting apabila para Imam dan Khatib ditugaskan sebagai tenaga pengajar di sekolah-sekolah melayu kerajaan khususnya untuk mengajar matapelajaran ugama yang dinamakan "Pelajaran Syariah" yang berhubung dengan pelajaran sembahyang dan Tauhid iaitu Rukun Iman dan Rukun Islam, sehingga pada tahun 1948M telah ditubuhkan satu bentuk kawalan terhadap pelajaran ugama di sekolah-sekolah melayu kerajaan dengan terlantiknya seorang Khatib menjadi *Chief Instructor* iaitu Pehin Siraja Khatib Haji Abu Hanifah dan seorang Imam iaitu Pehin Tuan Imam Haji Mohd. Saad menjadi nazir di samping menjadi tenaga pengajar.⁴¹

Jika dilihat peranan dan fungsi para Imam dan Khatib sejak mula wujudnya di Brunei, maka kita dapati bahawa golongan ini sangat penting sekali dalam memperkembangkan dan mempertahankan ajaran agama Islam daripada pengaruh-pengaruh dan juga penyelewengan-penyelewangan yang boleh merusak aqidah dan fahaman samada daripada golongan pemimpin mahupun rakyat jelata. Jawatan-jawatan mereka jarang sekali kosong, kerana keperluan keugamaan dan negara dalam banyak hal, samada dalam upacara beristiadat di Istana, Lapau dan lain-lain tempat yang beristiadat,

³⁹ *Ibid*, hal. 7. Mungkin dapat disimpulkan bahawa lantikan Ahli Majlis Mesyuarat Negeri itu pada asasnya adalah lantikan untuk "Chief Kadhi" (Kadi Besar) dan bukan kerana gelaran Manterinya.

⁴⁰ Haji Metussin Bin Haji Bakri, *op cit*, hal. 9.

⁴¹ Ustaz Haji Yahya bin Haji Ibrahim, YDPSKDPSS, *op.cit*, hal. 8. Lihat juga Ustaz Haji Yahya bin Haji Ibrahim, YDPSKDPSS, 'Peranan Institusi-Institusi Islam di Negara Brunei Darussalam' 1987, hal. 2. dan Lihat juga A. Aziz Juned, 'Buku Kenang-Kenangan Berpuspa', JHEU, 1968, dan Lihat juga Metassim bin Haji Jibah, 'Perkembangan Persekolahan Melayu di Brunei Dalam Pentadbiran Sistem Residen', 1906-1959, BMJ, Vol.5, No.3, 1983, pp. 1-6.

kerana tanpa kehadiran mereka di majlis-majlis atau acara-acara tersebut tidak akan menjadi lengkap dan sempurna.⁴² Dengan jasa dan tanggungjawab yang pernah dipikul oleh para Imam dan Khatib ini menyebabkan gelaran-gelaran seperti ini masih tetap wujud dan “*survive*” hingga sekarang tanpa banyak perubahan walaupun pemerintahan politik negara berubah sejak tahun 1906M.⁴³

Dalam zaman pemerintahan Sultan Haji Hassanal Bolkiah (Sultan Brunei Ke 29) ini, peranan Manteri-Manteri Ugama amat diperlukan dalam banyak hal sehingga gelaran bagi jawatan Pehin Khatib dan Mudim ditambah pada tahun 1996 daripada 4 Pehin Khatib dan Mudim, menjadi 8 Pehin Khatib dan 8 Mudim. Ini membuktikan bahawa peranan dan tanggungjawab mereka diperlukan pada setiap masa dalam apa jua majlis-majlis keugamaan yang belangsung di Istana dan sebagainya. Mereka juga ditugaskan untuk membaca doa di majlis-majlis rasmi ataupun tidak rasmi, diberi tanggungjawab untuk mengiringi keberangkatan raja dan kerabat diraja ke luar negeri samada keberangkatan tersebut dilakukan secara rasmi ataupun tidak. Inilah keunggulan institusi Manteri Ugama di Brunei yang banyak memainkan peranan penting dalam kepimpinan raja dan negara.

Masjid Dalam Undang-Undang Brunei

Dalam undang-undang Brunei terkandong padanya satu akta yang dipanggil sebagai Akta Majlis Agama dan Mahkamah-Mahkamah Kadi, Penggal 77, pindaan 1984. Akta ini merupakan khusus bagi perkara-perkara yang bersangutan dengan hal ehwal ugama Islam di Negara Brunei Darussalam.

⁴² *Ibid*, hal. 12.

⁴³ *Ibid*.

Sebagai sifatnya yang umum itu, akta ini telah memperuntukan beberapa bab atau seksyen didalamnya berhubung dengan masjid, perlantikan imam-imam dan sebagainya, khususnya dalam perkara-perkara yang bersangkutpaut dengan institusi masjid dan organisasinya.

Pada zaman pemerintahan Sultan Haji Omar 'Ali Saifuddin III (Sultan Brunei ke 28) yang memerintah negeri Brunei pada 6hb. Jun 1950-1967M bagi menggantikan kakanda baginda Sultan Ahmad Tajuddin yang lindung pada 4hb. Jun 1950M, baginda telah memulakan era baru dalam pembangunan negeri Brunei sehingga baginda terkenal dalam sejarah Brunei sebagai "Akitek Brunei Moden".⁴⁴

Dalam usaha baginda meningkatkan taraf hidup rakyat di negeri ini, baginda telah berjaya menangani isu-isu politik yang bergolak di dalam negeri dan juga luar negeri khususnya dalam hal-hal pentadbiran negeri yang selama itu dikuasai oleh *British Resident*.⁴⁵ Baginda telah berjaya menandatangani satu perjanjian bertulis dengan kerajaan British pada 29 hb September 1959M di Brunei, yang dinamakan dengan "Perlembagaan Bertulis Negeri Brunei", yang antara lain memperuntukkan pentadbiran dalam negeri Brunei yang selama ini dipegang oleh *British Resident* ditiadakan dan diganti dengan jawatan Menteri Besar. Di samping itu dalam perlembagaan tersebut baginda telah meletakkan Agama Islam sebagai Agama Rasmi Negara.⁴⁶

⁴⁴ Buku kenang-kenangan '*Perpuspaan 1 Ogos 1968*', Dewan Bahasa Dan Pustaka Brunei., 1968., hal. 39.

⁴⁵ Lihat *The Brunei Annual Report*, 1946., hal. 82. menyebutkan : 'His Highness will receive a British Officer to be styled Resident.... The Resident will be the Agent and Representative of His Britannic Majesty's Government under the High Commissioner for the British Protectorate in Borneo, and his advice must be taken and acted upon on all questions in Brunei other than those affecting the Mohammedan religion'.

⁴⁶ *Perlembagaan Negeri Brunei 1959*, hal. 32.

Sebagaimana yang termaktub di dalam Perlembagaan Bertulis Negeri Brunei, bahawa agama Islam adalah agama rasmi negara maka dalam masa pemerintahan baginda ini satu perubahan besar dalam pentadbiran Islam telah berlaku, dimana baginda sendiri telah memperkenankan satu pertubuhan atau perbadanan berkanun di tubuhkan atas nama Majlis Ugama Islam Brunei dan Adat Istiadat Brunei. Perbadanan ini telah ditubuhkan dalam tahun 1955M oleh Undang-Undang No. 20 Tahun 1955 iaitu Akta Majlis Ugama Dan Mahkamah-Mahkamah Kadi 1955⁴⁷, yang berkuatkuasa pada 1hb. Februari 1956M.

Majlis Ugama Islam Brunei atau disebut dalam bahasa Inggerisnya “*The Religious Council*” sebagaimana yang termaktub dalam Undang-Undang Negara Brunei Darussalam, Penggal 77, Akta Majlis Ugama Islam Dan Mahkamah-Mahkamah Kadi,⁴⁸ adalah merupakan sebuah badan yang kekal turun-temurun serta mempunyai meterai atau cop mohornya tersendiri.⁴⁹ Badan ini juga adalah merupakan institusi Agama Islam yang tertinggi di Negara Brunei Darussalam. Selain itu menurut Akta ini juga, badan ini berkuasa mendakwa dan ianya juga boleh didakwa atas namanya yang diperbadankan itu.⁵⁰

Sebagai sebuah badan atau institusi yang berkanun dan tertinggi di Negara Brunei Darussalam, tugas dan peranan utama Majlis Ugama Islam Brunei adalah untuk menasihati Sultan dan Yang Di Pertuan Negara Brunei Darussalam sebagai Ketua Ugama di negara ini khusus dalam perkara-perkara yang berkaitan dengan agama Islam. Hal ini telah dibutirkan dalam ‘Akta Majlis Ugama Islam Dan Mahkamah-Mahkamah Kadi’, Penggal 77, Seksyen 38, antara lain menyebutkan:

⁴⁷ Gelaran bagi Undang-Undang ini sebelum di pinda pada tahun 1984.

⁴⁸ Gelaran bagi Undang-Undang ini selepas pindaan 1984.

⁴⁹ *Ibid*, Seksyen: 6.

⁵⁰ *Ibid*, Seksyen: 7.

Majlis hendaklah, bagi pihak dan di bawah kuasa Kebawah Duli Yang Maha Mulia sebagai Ketua Ugama Rasmi Negara Brunei Darussalam, membantu dan menasihat Kebawah Duli Yang Maha dalam semua hal yang berkaitan dengan agama rasmi Negara Brunei Darussalam, dan hendaklah dalam semua hal-hal tersebut menjadi pihak berkuasa yang utama di Negara Brunei Darussalam, kecuali sejauh mana yang dipersyaratkan sebaliknya oleh Akta ini.

Jika dilihat tanggungjawab dan bidangkuasa Majlis Ugama Islam yang diperuntukkan oleh Undang-Undang Negara Brunei Darussalam, Penggal 77, Akta Majlis Ugama Islam Dan Mahkamah-Mahkamah Kadi ini, sangatlah berat sekali, kerana ia adalah induk bagi dasar pentadbiran agama Islam di Negara Brunei Darussalam dan bertanggungjawab dalam semua aspek yang bersangkut-paut dengan hal ehwal agama Islam. Kerana itu menurut undang-undang ini adalah menjadi kebijaksanaan Sultan yang memerintah melantik ahli-ahlinya dari kalangan orang-orang kenamaan dan ‘Alim Ulama’ yang berkelibar sahaja yang layak untuk menjadi ahli tersebut. Adapun keramaian ahli-ahli yang dilantik oleh Kebawah Duli Yang Maha Mulia Sultan mengikut undang-undang ini ialah seorang Yang Dipertua, seorang Naib Yang Dipertua dan tidak kurang daripada 6 orang ahli-ahli yang lain⁵¹ dan seorang Setiausaha. Manakala pusat pentadbiran Majlis Ugama Islam Brunei terletak di Kementerian Hal Ehwal Ugama Negara Brunei Darussalam.

Adapun bidangkuasa yang diperuntukkan kepada Majlis Ugama Islam Brunei ialah; Majlis Ugama Islam Brunei berkuasa dan boleh membuat kontrak-kontrak dan boleh memperolehi, membeli, mengambil, memegang dan menikmati harta benda alih dan

takalih dari setiap jenis, dan tertakluk kepada syarat-syarat dari mana-mana undang-undang bertulis yang menyentuh perkara yang sama boleh memindah hak, menyerah hak, menyerah balik dan menghasilkan, mencagar, menggadai janji, memajak, menyerah hak semula, memindah milik atau dengan jalan lain melepaskan, atau mengendalikan, mana-mana harta benda alih atau takalih yang diletak dalam tangan Majlis atas syarat-syarat sebagaimana yang difikirkan patut oleh Majlis dan menurut hukum syarak.⁵²

Majlis Ugama Islam Brunei juga adalah menjadi nazir dengan kuatkuasa undang-undang ini kepada semua masjid-masjid yang terdapat di Brunei Darussalam. Akta Majlis Ugama Islam Dan Mahkamah-Mahkamah Kadi, Penggal 77, Seksyen 123, menyebutkan:

Dengan tidak menghiraukan mana-mana syarat yang bertentangan dalam mana-mana suratcara bertulis, Majlis hendaklah menjadi penerima tunggal bagi semua masjid di Negara Brunei Darussalam dan setiap masjid, bersama dengan mana-mana harta benda takalih di mana ianya terdiri atau yang berkaitan dengannya dan digunakan bagi maksud-maksud daripadanya, selain daripada tanah Negara atau tanah yang disimpan bagi maksud awam, hendaklah setelah pendaftaran di bawah Undang-Undang Tanah, dan tanpa apa jua pindah hak, penyerahan hak atau pindah milik apa pun diletak dalam tangan Majlis bagi maksud-maksud Akta ini.

Adapun kuasa-kuasa Majlis Ugama Islam Brunei sebagai nazir kepada masjid-masjid seluruh negara adalah antara lain memberikan kebenaran bertulis kepada mana-mana orang yang hendak mendirikan masjid atau balai ibadat, atau mewakafkannya, atau dengan lain-lain jalan menggunakan sesebuah bangunan yang ada sebagai atau bagi maksud menjadikan sebuah masjid, membaiki atau mengubahsuai masjid, menutup dan

⁵¹ *Ibid*, Seksyen 13. (1),

meromboh bangunan masjid, menentukan sempadan bagi mana-mana mukim masjid dan meminda dan mengubah sempadan-sempadan, disamping bertanggungjawab pada membaiki dari satu masa kesatu masa sebagaimana yang diperlukan dalam memelihara semua masjid-masjid di Negara Brunei Darussalam dengan menggunakan kumpulan wang daripada wakaf ‘am atau pentadbiran ‘am.⁵³

Dengan adanya pengawalan pembinaan institusi Masjid menurut undang-undang ini, segala rancangan ke arah memberikan kemudahan dan keselesaan kepada umat Islam mengerjakan amal-amal ibadat kepada Allah s.w.t di negara ini berjalan dengan baik dan teratur. Sehingga kini hampir seluruh mukim dan kampong di negara Brunei Darussalam telah didirikan masjid-masjid dan balai-balai ibadat untuk memenuhi keperluan masyarakat setempat.

Majlis Ugama Islam Brunei selain menjadi pengawas atau nazir kepada masjid-masjid seluruh negara, ianya juga berkuasa dan boleh mengeluarkan fatwa-fatwa agama di dalam negara ini dan berkuasa memberi kebenaran kepada orang-orang Islam memungut derma di dalam negeri ini bagi tujuan-tujuan keugamaan, berkuasa untuk bertindak sebagai wasi sesuatu wasiat, pentadbir harta pusaka atau pemegang amanah bagi sebarang amanah, berkuasa untuk memungut semua zakat dan fitrah, berkewajiban menjaga dan menanggung belanja orang mua'laf dan berkuasa mengeluarkan kebenaran bagi sebarang pengajaran agama Islam di Negara Brunei Darussalam. Selain daripada itu juga Majlis Ugama Islam Brunei berkuasa menasihat dan mencadangkan perlantikan Mufti, Kadi Besar, Timbalan Kadi Besar, Kadi-Kadi Daerah, Pegawai-Pegawai Masjid (Imam dan Bilal), Amil-Amil dan Jurunikah-Jurunikah di Negara Brunei Darussalam pada bila-bila

⁵² *Ibid*, Seksyen 8.

⁵³ *Akta Majlis Ugama Islam Dan Mahkamah-Mahkamah Kadi*, Seksyen : 123,124, 125,126 dan 127.

masa terdapatnya kekosongan pada jawatan-jawatan tersebut dengan dilantik dan diberi tauliah oleh Sultan sendiri akan pegawai-pegawai tersebut.⁵⁴

Skim Perkhidmatan Pegawai-Pegawai Masjid

Di Negara Brunei Darussalam lantikan bagi jawatan Pegawai-Pegawai Masjid seperti Imam, Bilal dan Merbut adalah merupakan jawatan dalam perkhidmatan awam yang di luar bidangkuasa Suruhanjaya Perkhidmatan Awam. Jawatan-jawatan ini adalah dilantik oleh Kebawah Duli Yang Maha Mulia Paduka Seri Baginda Sultan Dan Yang Dipertuan Negara Brunei Darussalam sebagaimana termaktub dalam Undang-Undang Negara Brunei Darussalam, Penggal 77, Akta Majlis Ugama Islam dan Mahkamah-Mahkamah Kadi Seksyen 129 dan 130.

Kuasa melantik pegawai-pegawai masjid di atas adalah selaras dengan kehendak ugama Islam kerana Raja atau Sultan itu adalah Ketua Ugama dan pemerintah tertinggi dalam sesebuah negara. Ini bertujuan supaya rakyat atau orang-orang Islam tidak bersusah payah memilih siapa yang berhak menjadi Imam di dalam sesebuah masjid itu. Jika seseorang yang ditauliahkan dan dilantik oleh sultan menjadi Imam di sesebuah masjid itu, maka Imam itu berhak menjadi Imam daripada orang lain, meskipun orang lain lebih mulia dan lebih pandai daripada dirinya.

Adapun tempoh bagi perkhidmatan jawatan-jawatan tersebut adalah mengikut peraturan perkhidmatan awam biasa iaitu mereka juga akan bersara dalam perjawatan setelah mencapai umur ke 55 tahun. Walau bagaimanapun mereka tidak semestinya

⁵⁴ Ibid, Seksyen 129 dan 130. Lihat juga Buku Kenang-kenangan, ‘Isti’adat Pembukaan (Bangunan Baru) Jabatan Hal Ehwal Ugama, Negeri Brunei’, 1966, hal. 51, 52.

berhenti terus dari jawatan mereka seperti lazimnya pada jawatan-jawatan selain daripada jawatan ini, jika difikirkan tenaga mereka diperlukan berdasarkan kepada Undang-Undang Negara Brunei Darussalam, Penggal 77, Akta Majlis Ugama Islam Dan Mahkamah-Mahkamah Kadi, Seksyen 131 (1), menyebutkan:

Setiap Pegawai Masjid hendaklah memegang jawatannya selama yang disukai oleh Kebawah Duli Yang Maha Mulia dan boleh dipecat oleh Kebawah Duli Yang Maha Mulia bagi sebab-sebab yang difikirkan baik.

Jika dilihat kepada peruntukan Undang-Undang ini, bermakna jawatan Pegawai Masjid itu adalah terletak di bawah kuasa Sultan yang memerintah yang juga menentukan seseorang itu diteruskan perkhidmatannya atau dipecat. Ini menunjukkan bahawa peranan Pegawai Masjid itu kepada agama, negara, raja, dan masyarakat amatlah dituntut dan penting sekali, sesuai dengan kedudukkannya yang tinggi dalam agama dan masyarakat setempat.

Memandangkan pentingnya peranan Pegawai-Pegawai Masjid itu dalam pembangunan masyarakat, usaha ke arah meningkatkan taraf dan kewibawaan pentadbiran masjid-masjid di Negara Brunei Darussalam benar-benar berfungsi sebagaimana sepatutnya serta dapat mengimbangi perkembangan masa, satu Skim Perkhidmatan Imam / Khatib / Bilal / Merbut yang baru telah pun diperkenankan oleh Kebawah Duli Yang Maha Mulia Paduka Seri Baginda Sultan Dan Yang Di-Pertuan Negara Brunei Darussalam yang berkuatkuasa mulai 1hb Januari 1984. Dalam skim perkhidmatan tersebut tingkatan dan sukatan gaji bagi pegawai-pegawai masjid adalah seperti berikut :-